

Siunnersuummut oqaaseqaatit

Oqaaseqaatit nalinginnaasut

1. Aallarniut

Kalaallit Nunaanni Eqqartuussiveqarfik pilersillugu inatsiseqarnerup isumagineqarnissaanut inatsisip nutsaap 1. januar 2010-mit atuutilerneratigut unammillernermut inatsisip naleqquttunngorsarnissaanik allannguutissatut siunnersuut siunertaqarfigineqarpoq.

2. Siunnersuummi pingaarnertut immikkoortortat

Siunnersuummiipput unammillernermut inatsisip §§ 26-anut 27-anullu allannguutissatut siunnersuutit.

Aqutsisutut oqartussaaffinnut allanut Unammillernermut aalajangiisartut aalajangiussai maalaarutigineqarsinnaanngillat, inuinnartulli eqqartuussisunut suliassanngortinneqarsinnaallutik.

Unammillernermut aalajangiisartut Kalaallit Nunaanni Eqqartuussiveqarfimmut oqartussaaffittut siullertut suliassanngortinneqarnissaat naapertuunnerpaasutut nalilernerqarpoq, unammilleqatigiinnermut inatsit najoqqutaralugu aalajangiussinerit nalilernissaannut pisariaqartinneqartunik inatsisitigut kredsrettit ilisimasaqassanngatinneqanngimmata.

3. Pisortaqarfimmut aningaasaqarnikkut aqutsisoqarnikkullu sunniutit

Siunnersuut pisortaqarfimmut aningaasaqarnikkut imaluunniit aqutsisoqarnikkut sunniteqassanngitsutut naatsorsuutigineqarpoq.

4. Inuussutissarsiuteqarfimmut il.il. aningaasaqarnikkut sunniutit

Siunnersuut inuussutissarsiuteqarfimmut il.il. aningaasaqarnikkut sunniteqassanngitsutut naatsorsuutigineqarpoq.

5. Avatangiisinut aamma pinngortitamut sunniutit

Siunnersuut avatangiisinut aamma pinngortitamut tunngasunik sunniuteqassanngitsutut naatsorsuutigineqarpoq.

6. Innuttaasunut aqutsisoqarfikkut sunniutit

Siunnersuut innuttaasunut aqutsisoqarfikkut sunniuteqassanngitsutut naatsorsuutigineqarpoq.

7. Naalagaaffeqatigiinnermut Namminersornermullu attaveqarnerit

Siunnersuut Naalagaaffeqatigiinnermut Namminersornermullu attaveqarnerit sunniuteqassanngitsutut naatsorsuutigineqarpoq.

8. Oqartussaasuni, kattuffinni il.il. tusarniaaneriit

Siunnersuut makkunani tusarniaaffiusimavoq: Siulittaasup Naalackersuisoqarfia, Aningaasaqarnermut Naalackersuisoqarfik, Ineqarnermut, Attaveqarnermut Angallanermullu Naalackersuisoqarfik, Kanukoka, Sulisitsisut, Nusuka, SIK, Atuisunut siunnersuisoqarfik, Unammillernermut nakkutilliisoqarfik aamma Nunatsinni Takornariaqarnermut Inuussutissarsiornermullu Siunnersuisoqatigiit.

Sapinngisamik annertunerpaamik tusarniaanermiit akissutaasut siunnersuummut ilanngunneqarsimapput.

Siunnersuummi malittarisassanut ataasiakkaanut oqaaseqaatit

§ 1-imut

Nr. 1-imut

Allatut aqutsisoqarfittut oqartussaaffeqarfimmut Unammillernermut aalajangiisartut aalajangiussineri saqqummiunneqarsinnaanngitsut Unammillernermut inatsisaasumi § 26, imm. 1-imi aalajangerneqarpoq.

Aalajangersimasunik pisoqartillugu § 26, imm. 2-mi aalajangiussinerit arlallit Kalaallit Nunaanni Landsrettimut oqartussaaffittut siullertut inuttut eqqartuussisunut suliassanngortillugit saqqummiunneqarsinnaasut tullerriarneqarput.

§ 26, imm. 2-mi allannguutikkut Unammillernermut aalajangiisartut aalajangiussineri Kalaallit Nunaanni Eqqartuussiveqarfik siullertut oqartussaaffeqartuutillugu eqqartussivinnut inuttut eqqartuussisunut suliassanngortillugit saqqummiunneqarsinnaasut erseqqissaavigineqarpoq.

Nr. 2-mut

§ 26, imm. 3-p atorunnaarsinneqarneratigut aalajangiinerit suut tamarmik eqqartuussivinnut saqqummiunneqarsinnaasut erseqqissaavigineqarpoq.

Nr. 3-mut

Unammillernermut aalajangiisartut aalangiussinerup erniinnaartumik atuutsilersinnissaanut pisinnaatitaaffeqarnerat erseqqissarneqarpoq.

Nr. 4-mut

§ 27-mi Kalaallit Nunaanni Eqqartuussiveqarfimmut aalajangiussinerup saqqummiunnissaanut piffissaliineq sap. akunnerinik sisamanik sivisussuseqartoq aalajangerneqarpoq.

Kalaallit Nunaanni Landsrettip Kalaallit Nunaanni Eqqartuussiveqarfik siullertut oqartussaaffeqartunngorlugu allannguinnikkut inatsit inatsiseqarnerup isumagineqarnissaanut inatsimmut naleqqussarneqarpoq.

§ 2-mut

Inatsisartut inatsisaat 1. januar 2010-mi atuutilissasoq siunnersuutigineqarpoq. Kalaallit Nunaanni Eqqartuussiveqarfiup atuutsilerfigalugu Kalaallit Nunaanni inatsit isumagineqarnissaanut inatsit nutaaq ullormit 1. januar 2010-mit atuutsilerfeqarmat ulloq taanna toqqarneqarpoq.